


**АУЫЛ
ЕЛ БЕСІГІНЕ
АЙНАЛА
МА?**

3-бет



**ПАКИСТАНДЫҚ
АЛАЯҚТЫҚ
ЛАҒЫ**

8-бет

ЗАҢ газеті

ZANMEDIA.KZ

Қоғамдық-саяси, құқықтық газет

✉ zangazet@mail.ru

№28 (3559) 14 сәуір 2023



БҮГІНГІНІҢ БАС ТАҚЫРЫБЫ

ҮШАУЫСЫМДЫ МЕКТЕП: СӨЗ БЕН ІС НЕГЕ ҚАБЫСПАЙДЫ?



Үшауысымды мектеп мәселесі бүгін пайда болған жоқ, айтыла-айтыла жауыр болған тақырып. Әр жылдары бұл тақырып Мемлекет басшыларының халыққа арнаған жолдауларында да сөз болды. Алайда, үшауысымды мектеп мәселесін Білім және ғылым министрлігін 2013 жылдың 2 қыркүйегінен 2016 жылдың 10 ақпанына дейін басқарған Аслан Сәрінжіпов та, 2016 жылдың 10 ақпанынан 2019 жылдың 25 ақпанына дейін басқарған Ерлан Сағадиев те шеше алмады.

(Соңы 3-бетте)

БАЗЫНА

Жаманшылық шақырғымыз келмейді-ақ, ежелден елдік қасиетінен айырылмаған жұрттың ұрпағымыз. Басымызға қандай күн түссе де, тәубесінен жаңылмаған, сұрапыл сұмдық замандарды бастан кешіп тұрып, «Қайда барсаң Қорқыттың көрі» деп түңілмеген, ел болашағына сеніммен, еңсесін тіктеп қарап келген қайсар халықпыз.

Дегенмен, «басынан қиқу кетпейтін тайқымандай жұрт екенбіз-ау осы!» деген ауыр ойлардың кей-кейде санаңды жайлап алып, жегі құрттай жеміріп, көңілді алаңдатып, мазаны алатыны жасырын емес. Ел ішіндегі ұлтаралық қарым-қатынас жағдайы, ара-тұра, жерошақтағы көңірісіп өшпей жатып алатын оттай лап етіп тұтанып, өрши түсіп, басыла қалатын дау-жанжалдар жұртының амандығы мен тыныштығын, жарқын келешегін көксеген көңілді алаңдатпай тұра ма?

ЖЕРІМІЗ ЖІКШІЛДІК ОШАҒЫНА АЙНАЛМАУЫ КЕРЕК!

«Жікшілдік» – жақсы амақ емес

«Жікшілдік» – жақсы атақ емес, атағың келмейтін, сүйкімсіз ауыр сөз. «Жер астынан жік шықты, екі құлағы тік шықты» деп келетін, жайсыздықты аңғартып, тіксіндіретін тіркестер біздің ауыз әдебиеті – фольклорымыздың өзінен кездесіп, халқымыздың бұл сөзден жирендірердей тәрбиелік бағытын бала кезімізден аңдағанбыз. Анығы сол, қазақ табиғатынан жікшіл жұрт болмаған, бірлігі жарасқан, ынтымақшыл, қоғамшыл, бауырмал ел болып қалыптасқанымыз әлмисақтан белгілі. Ал жікшілдік – қанға сіңген қасиет емес, өзге елдермен қарым-қатынас орайында, солардың ықпалымен туындап, өршіп отырған, жүре келе жұғып, жабысқан, қасқу-нем күштердің жаулық ниетінен жол-жөнекей пайда болған кесел. Қазақтай бауырмал,

қылаусыз адал, кіршіксіз таза жүректі жұртты табу қиын, кімге болсын, жанашыр, дос ниетті ел екенімізді жақынымыз тұрмақ, жауымыз да мойындаған.

Бірақ, «Ауруын жасырған өледі» дегендей, өз елінде туындап, әлсін-әлсін қоздап отырған, тұрасын айтқанда, пиғылы теріс әлдекімдердің, әлдебір іштен ірікті тудыруға құмар жікшіл күштердің, орынсыз жерден қиюластырып, ұлтаралық араздық, дау-жанжалға жол беріп, өршітетін, саяси тұрақсыз топтардың қасақана, отқа май құя түсіп, қоздатып отырған осы сепаратистік-жікшілдік ұстанымдары қалай жаныңды ауыртпасын, қалайша сеніміңе селкеулік түсірмесін?

Біз ежелден, жағасы – жайлау, кеңпейіл, адам баласына жанашыр, дастарқаны жиылмаған, көлденең көк аттыны да құр жібермей тұз-дәмін беріп, бар ықыласымен сыйлайтын, туралап келген жолаушыны қолтықтап, құрметтеп аттан түсіріп, қарсы алатын жұрт

екенімізді, өз бауырымыз, қандасымыз тұрмақ, бір кездегі біреулері үкіметіне арқа сүйеп, омыраулап, өңмендей енсе, енді біреулері саяси толқымалы, дүрбелең кезеңдерде, монтаны, момақан қалпымен топырағымызды басқан келімсек, кірмелер, санқилы саяси дүрмектердің тұсында, соғыс өрті тұтанған, бастарына қара бұлт төнген шақтарда жерімізге келіп орныққан, бауыр басқан жат жұрттардың да әбден көзі жетіп еді. Енді келіп, бейбіт күнімізде бұл дау-жанжалдардың тууына, біржақты басылып тынбай, өршіп отыруына, жікшіл-сепаратистік пиғылдардың дүркін-дүркін ел тыныштығын бұзып, берекемізді алуына не себеп? «Жаман үйді қонағы билейдінің» кері келіп, кейбіреулерді, өз тарихи отанымызда, төрімізде тойтаңдатып, тым басымызға шығарып алғандаймыз-ау осы?» – деген ойлар еріксіз санаңды шабақтап, осықлап өтердей.

(Соңы 4,5-беттерде)

ҰТЫСТАН ҚҰР ҚАЛМАҢЫЗ!

Біздің басылымдарға жазылып, ұтысты болыңыз!
Басты сыйлық – **АЙФОН 14 ПРО МАКС!**

Бұдан бөлек: Айфонның құлаққабы, сағаты, 2 REDMI NOTE 11 Pro ойнатылады. Сондай-ақ, қысқатолқынды пеш, шаңсорғыш, үтік секілді көптеген тұрмыстық техникалар бар. Бірқатар жүлдегер «Заң» медиа-корпорациясының қолдауымен жарыққа шыққан «ШЫТЫРМАН» шығармалар жинағына ие болады.

ҰТЫСҚА ҚАТЫСУ ҮШІН НЕ КЕРЕК?
Ол үшін пошта бөлімшесіне барып:
«Заң газетіне» (индекс – 65921); «Юридическая газетаға» (индекс – 65928); «Заң» журналына (индекс – 75849); «Фемида» журналына (индекс – 75858) жыл соңына дейін жазылып, түбіртеккің көшірмесін бізге жолдасуыңдар болғаны!
Екі басылымға жазылғандардың мүмкіндігі екі есе өседі!
ҰТЫС ИЕГЕРЛЕРІ 28 МАУСЫМ – журналистер күні анықталады.
Ал, іске сәт!

ЕҢБЕК ДАУЫ

МҰНАЙШЫЛАРДЫҢ ТАЛАБЫНА ҚАТЫСТЫ АРНАЙЫ КОМИССИЯ ЖҰМЫСЫН БАСТАДЫ

Маңғыстау облысы Жаңаөзен қаласындағы «БерӘлі Маңғыстау Company» мекемесінде жұмыс істеген 100-ден астам адам 4-сәуір күні «Өзенмұнайгаз» компаниясының алдына жиналып, компания басшылығынан тұрақты жұмыс талап еткен. Ел назарын аударған бұл наразылық одан кейінгі күндері де жалғасты.

Жұмыс талап еткен көпшілік 6-сәуірде Президент Қ.Тоқаев пен Үкімет басшысы Ә.Смайыловтан мәселені шешуге көмектесуін, егер мәселеге Ақорда араласпаса өздерінің Астанаға келетінін ескерткен. Осы мақсатта 10-сәуір күні 82 мұнайшы пойызбен Астанаға жетіп, ҚР Энергетика министріне барды. Дәл сол түні министрлік алдына қонып, ертесінде өз талап-тілектерін айтып, наразылық митингілерін жалғастырған. ҚР Энергетика министрі Алмасадам Сәтқалиев мұнайшылардың бұл әрекетін «өздеріне назар аударту мақсатында ұйымдастырылған әрекетке балап, арнайы пікір де білдірді. Бұдан кейінгі уақытта ереуілшілерге келген «ҚазМұнай-Газ» өкілдері мен депутаттардың келіссөзі еш нәтиже бермеген. 11 сәуір күні кешкі 18.50-де арнайы жасақ рұқсат етілмеген митинг жасаушыларды ұстап, полиция бөлімшелеріне жеткізген. Елордадағы бұл әрекет жаңаөзендіктердің наразылықтарын туғызып, олар да өз өңірлерінде қамалған мұнайшыларды босатуын талап етіп 2000-дай адам көшеге шығып митингілер жасады, қатынас жолдарын жапты.

12 сәуірде үкімет өкілдері полиция бөлімшелеріндегі мұнайшылармен келіссөздер өткізіп, Астанада олардың 10 өкілін қалдырды да, басқаларын елдеріне аттандырды. Мемлекетте жаңаөзендік жұмысшылардың талаптарын қарайтын, мәселені заң аясында зерттейтін арнайы топ құрылды. Және ол топ наразылардың өздерін араластыра отырып, мәселені тиімді шешудің жолдарын іздестіруде. Ел зиялылары мен жергілікті билік өкілдері халықты сабырға шақырып, асығыс әрекеттерге бармауын, арандатуларға түсіп қалмауын өтінді.

Ж.ҚҰРМАНБАЙ

